

EKONOMSKO- SOCIJALNO VIJEĆE ZA TERITORIJU FEDERACIJE BOSNE I HERCEGOVINE

Broj: 03-30/14-2786/20
Sarajevo, 17.12.2020. godine

Z A P I S N I K

sa 6-126. sjednice Ekonomsko-socijalnog vijeća za teritoriju Federacije Bosne i Hercegovine, održane dana 17.12.2020. godine u 13:30 sati.

Sjednicom predsjedava Edhem Biber, predsjednik Ekonomsko-socijalnog vijeća.

Prisutni predstavnici Vlade: Fadil Novalić, Jelka Milićević, Vesko Drljača, Nermin Džindić, Amir Zukić.

Prisutni predstavnici Poslodavaca: Mladen Pandurević, Edin Ibrahimpašić, Senad Džambić, Zoran Gazibarić, Josip Kraljević.

Prisutni predstavnici Sindikata: Mevludin Bektić, Samir Kurtović, Sinan Husić, Bajro Melez, Zijad Latifović, Mirza Hadžiabdić, Dubravko Pervan.

Sjednici nisu prisustvovali Denis Lasić, Šemsudin Dedić, Adnan Smailbegović, Ivan Luburić, Lejla Čatić.

Pored članova Ekonomsko-socijalnog vijeća sjednici su prisustvovali: Zlatko Hurtić i Goran Miraščić, predstavnici ureda premijera FBiH, Nedžad Čongo - BH Telecom, Eldin Šabanović - JP BH Pošta.

Sjednicu je otvorio i pozdravio prisutne predsjednik ESV-a. Nakon što je konstatiran kvorum, predložen je dnevni red:

DNEVNI RED

1. Usvajanje zapisnika sa sjednice ESV-a;
2. Prednacrt Zakona o vijeću zaposlenika;
3. Strategija zapošljavanja u FBiH;
4. Uredba o postupku prijema u radni odnos u javnom sektoru u FBiH;
5. Zahtjev Sindikata za dodatno zapošljavanje u zdravstvenom sektoru;
6. Inicijativa Poslodavaca za donošenje Poslovnika o izmjenama i dopunama Poslovnika o radu ESV-a;
7. Razno

Predsjednik ESV-a konstatirao je da je predloženi dnevni red usvojen.

Ad.1

Usvojen je zapisnik sa predhodne sjednice s napomenom da se na zaključke sjednice treba intervenirati kad se donose, a ne naknadno kad su već usvojeni.

Ad.2

Uvodno izlaganje o Prednacrta Zakona o vijeću zaposlenika iznio je ministar Vesko Drljača, nakon čega je otvorena diskusija.

Predstavnici Sindikata informirali su prisutne da je po pitanju Zakona o vijeću zaposlenika održan radni sastanak sa predstavnicima Poslodavaca. Konstatirano je da su obje strane imaju usuglašene stavove po mnogim tačkama i da im je potrebno dodatnih desetak dana da konsolidiraju primjedbe i da ih zajedno sa predstavnicima Poslodavaca dostave ESV-u.

Predstavnici Poslodavaca smatraju da se radi o dobrom zakonu. Odustali su od mnogih primjedbi osim onih koje se odnose na usklađenost sa međunarodnim zakonima.

Zaključak:

Ekonomsko socijalno vijeće je razmatralo Prednacrta Zakona o vijeću zaposlenika, te predlaže resornom ministarstvu da se poslije objedinjavanja primjedbi i sugestija od strane socijalnih partnera još jednom sastanu kako bi usaglasili sporne prijedloge i sugestije.

Nakon što bude usuglašen od sva tri socijalna partnera Prednacrta Zakona o vijeću zaposlenika još jednom će biti predmet rasprave na jednoj od narednih sjednica Ekonomsko socijalnog vijeća.

Ad.3

Uvodno izlaganje o Strategiji zapošljavanja u FBiH za period 2021-2027 godina iznio je ministar Vesko Drljača. Nakon izlaganja otvorena je diskusija.

Predstavnici Sindikata smatraju da je ova strategija dobar osnov za rješavanje problema zapošljavanja i da imaju prijedloge koje su vezani za pojedine struke, nivo obrazovanja i migraciju radne snage. Također smatraju da razvoj privrede i cijena rada treba biti sastavni dio ove strategije. Svoje prijedloge zvanično će poslati Federalnom ministarstvu rada i socijalne politike.

Predstavnici Poslodavaca rekli su da se primjedbe i prijedlozi koje će uputiti uglavnom odnose na motiviranje za zapošljavanje, odnosno sniženje cijene rada, neustavno kažnjavanje iznajmljivanja radne snage, kao i privatne centre za edukaciju koji ne mogu imati monopol u tom djelokrugu. Podržavaju Strategiju zapošljavanja i insistiraju da socijalni partneri budu uključeni u izradu Operativnog plana strategije.

Zaključak:

Ekonomsko-socijalno vijeće je podržalo Nacrt Strategije zapošljavanja u Federaciji BiH 2021.-2027., uz određene primjedbe i sugestije socijalnih

partnera koje će Federalno ministarstvo rada i socijalne politike razmotriti i ugraditi.

Također, resorno ministarstvo će uključiti socijalne partnere u izradi Operativnog plana za implementaciju Strategije, kako bi dali dodatni kvalitet.

Ad.4

Za Uredbu o postupku prijema u radni odnos u javnom sektoru u FBiH uvodno izlaganje dao je Zlatko Hurtić. Uredba je rađena na osnovu Zakona o radu i rasprave provedene na ESV-u. Bilo je dosta primjedbi pa je nakon konsultiranja sa FMRSP predložena izmjena dva ključna člana, koja bi mogla otkloniti probleme nastale u uvjetima pandemije. Ispred Ureda Premijera iznio je dva razmišljanja koja su se u raspravama sa Poslodavcima i Sindikatom izdvojila kao moguće izmjene vezane za javni sektor. FMRSP treba da procijeni da li su one u skladu sa zakonom ili će doći do izmjene zakona kako bi se situacija popravila.

Predstavnici Poslodavaca podržavaju prijedlog Ureda premijera, ali smatraju da ih ponekad objavljivanje oglasa usporava, pa bi omogućavanje interne mobilnosti znatno olakšalo postizanje krajnjeg cilja – dobiti.

Predstavnici Sindikata slažu se da procedure prijema usporavaju poslovanje i mole da se Uredba stavi van snage na određeni period i sagledaju rezultati. Pored toga, predstavnik Sindikata zdravstvenih radnika, inicijatora izmjene ove Uredbe, podržavaju navedeni prijedlog i dodaju nekoliko bitnih dopuna. Prije svega to je zapošljavanje zdravstvenih radnika sa biroa koji su u doba pandemije neophodni zdravstvenom sistemu. U članu 5. treba dodati tačku d) koja bi glasila: prijem zdravstvenih radnika u zdravstvene ustanove na najmanje godinu dana zbog stanja pandemije, uz sufinanciranje.

Zaključak:

Ekonomsko-socijalno vijeće je podržalo donošenje izmjena i dopuna Uredbe o postupku prijema u radni odnos u javnom sektoru u FBiH, u skladu sa iznijetim prijedlogom Ureda premijera FBiH, vodeći računa da predložene izmjene budu u okviru zakonskih normi, čija implementacija bi omogućila efikasnije upravljanje ljudskim resursima u uslovima pandemije.

Ad.5

Zahtjev Sindikata za dodatno zapošljavanje u zdravstvenom sektoru upućen je Vladi prije mjesec dana. U obavljenim razgovorima složili su se da treba naći načina za dodatno zapošljavanje u zdravstvenom sektoru.

Predstavnici Vlade pri tom su naglasili da su zdravstvene ustanove na proračunima županija. Vlada, kao suosnivač, može pomagati samo klinički centar. Zato treba početi od kantona, gdje bi se mladi primali na stažiranje uz uporedno angažiranje što većeg broja medicinskog osoblja.

Zaključak:

Ekonomsko-socijalno vijeće nakon što je razmatralo inicijativu Sindikata za dodatno zapošljavanje u zdravstvenom sektoru stava je da federalni nivo, koji ima drugi vid direktne potpore zdravstvu, nije nadležan za ovu problematiku, te predlaže da se uputi inicijativa prema kantonalnim vladama u cilju razmatranja i prihvatanja prijedloga Sindikata kako bi se poboljšalo stanje u svim zdravstvenim ustanovama u uslovima pandemije.

Ad.6

Inicijativa Poslodavaca za donošenje Poslovnika o izmjenama i dopunama Poslovnika o radu ESV-a odnosi se na omogućavanje održavanja online sjednica.

Zaključak:

Ekonomsko socijalno vijeće prihvaća inicijativu Poslodavaca za izmjenu i dopunu Poslovnika o radu ESV-a. Sekretarijat ESV-a će uputi izmjene i dopune u Službeni list Federacija BiH, napraviti prečišćeni tekst Poslovnika i poslati ga svim članovima ESV-a.

Ad.7

Predsjednik ESV-a obavijestio je socijalne partnere da je na Kolegiju ESV-a zaključeno da će se naknade za rad u ESV-u isplaćivati samo članovima koji su prisustvovali sjednici ESV-a. Za pravdanje izostanka obraćaju se šefu delegacije. Predstavnici Poslodavaca predložili su da se napravi Prijedlog ovog zaključka koji bi se onda zvanično usvojio na sjednici ESV-a.

Predstavnici Sindikata smatrali su važnim naglasiti da su zbog trenutne situacije inicijative oko kolektivnih ugovora i pregovaranje ograničene. Treba uložiti napor na prevazilaženju ovih ograničenja jer se radnici osjećaju nezaštićenim i pristupiti izmjenama Zakona o radu.

Pored toga istakli su da je pandemija izazvala probleme oko nabavke čak i osnovnog materijala. Naveli su primjer Elektroprivrede gdje manjak zaliha može dovesti do velikih problema i u proizvodnji i u distribuciji. Traže od Vlade FBiH izmjene Zakona o javnim nabavkama kojima bi iz sistema javne nabavke izuzele minimalne količine materijala potrebnog za nesmetano obavljanje osnovne djelatnosti.

Pored toga, po pitanju Zakona o javnim nabavkama postoje nejasnoće između stavova Elektroprivrede i Vlade FBiH. Smatraju da kriminal treba procesuirati, a rudnike restrukturirati onako kako je definirano dogovorom između Elektroprivrede, Vlade i Sindikata.

Kako su gubici zbog cijena električne energije evidentni traže od Vlade da intervenira preko FERK-a, a od resornog ministra objašnjenje dopisa kojim se u ovakvim okolnostima traži 15% uštede.

Resorni ministar odgovorio je da u pojedinim rudnicima ima neiskorištenih zaliha i do 70 miliona KM. Smatra to rezultatom lošeg upravljanja koje treba popraviti i te zalihe iskoristiti da bi se dobila potrebna ili nedostajuća sredstva. Poboljšano poslovanje omogućilo bi i uštede koje bi se usmjerile na rudnike kao što su Kreka ili Zenica. Istakao je da Plan poslovanja za 2021-2023. godinu transparentno pokazuje

poskupljenje električne energije za građane. Sastanak Uprave EP, Vlade i FERK-a već je predlagan jer Vlada nastoji da napravi dogovor.

Premijer Vlade Federacije BiH dodao je da se slaže da je postojeći Zakon o javnim nabavkama prevaziđen i često predstavlja prepreku. Napraviće se nove odrednice koje mogu imati i određene posljedice, ali će gubici biti nadoknađeni.

Premijer je dao pojašnjenje i na pitanje Poslodavaca da li sredstva MMF-a koja su preusmjerena na kantonalne vlade treba da se iskoriste za ekonomiju, tj. kao pomoć poslodavcima za očuvanje radnih mjesta ili će se koristiti za „krpanje rupa u budžetu“. Sredstvima MMF-a zadužena je Vlada FBiH i RS, a sredstva data kantonima trebaju biti iskorištena za prevazilaženje teškoća izazvanih pandemijom - u socijalnom, zdravstvenom i privrednom sektoru. Od vlada kantona je zavisilo kome će ta sredstva dodijeliti.

Sjednica ESV završena je u 14:30 sati. Vrijeme i mjesto održavanja sljedeće sjednice ESV, kao i dnevni red biće određen na Kolegiju ESV, koji je planiran da se održi sredinom januara 2021. godine.

Predsjednik Ekonomsko-socijalnog vijeća
Edhem Biber

Zapisnik pripremila:
Snježana Kapić, MBA & mr.sci